

3. Quo custode procul pelle,  
Rex Christe piissime,  
Omne nefas inimici,  
Mundo corde et corpore,  
Paradiso redde tuo  
Nos sola clementia.

4. Gloriam patri melodis  
Personemus vocibus,  
Gloriam Christo canamus,  
Gloriam paraclito,  
Qui trinus et unus Deus  
Extat ante saecula. Amen.

25.

In festo Dedicationis S. Michaelis. Ad Vesperas.

1. Tibi Christe splendor patris,  
Vita, virtus cordium,  
In conspectu angelorum  
Votis, voce psallimus:  
Alternantes concrepando  
Melos damus vocibus.

2. Collaudamus venerantes  
Omnes coeli milites;  
Sed praecipue primatem  
Coelestis exercitus,  
Michaelem in virtute  
Conterentem Zabulon.